

# Powšitkowne WOZJEWJENJA

njedźelu, 16. awgusta 2015

## Zelowy swjedzeń w Klóštrje

W klóšterskej zahrodze w Pančicach-Kukowje je njedźelu, 16. awgusta, tradicionelny zelowy swjedzeń. Ekumeniski nyšpor w 14.30 hodź., na kotrymž so zelowe kwěćele požohnuja, změjtaj Kulowski kapłan Michael Noack a ewangeliski farar Matthias Monz z Kulowa. Rjadniske sotry Božu službu sobu wuhotuja. Popołdnu so tež zelowe wiki přewjedu a budže klóšterski wobchod wotewrjeny.

## Zetkanje samostejacych w Smochćicach

Samostejacy ze serbskich wosadow su na swoje přichodne zetkanje wutoru, 1. septembra, w 14 hodź. do Domu biskopa Bena w Smochćicach přeprošeni. Zajimcy njech so prošu hač do srjedy, 26. awgusta, w redakciji Katolskeho Posoła přizjewja, telefonowe čisło (0 35 91) 55 02 12. Štóż chce wotewzaty być, njech to prošu zdžěli.

## Wulět serbskeje dekanatneje młodžiny

Lětuši wulět serbskeje młodžiny budže njedźelu, 6. septembra, do Slepoho a Błótow. Bus wotjědže w 10.30 hodź. na farskim dworje w Chrósćicach. Wón pozastanje w 10.40 hodź. w Ralbicach před faru a w 10.50 hodź. w Kulowje na torhošću. Přizjewjenja přijimuju so hač do štwórtka, 27. awgusta, w Dekanatnym dušepastyrstwe we Worklecach, telefonowe čisło (03 57 96) 9 55 95. Pozdžiše přizjewjenja njejsu hižo móžne. Wšitcy serbscy młodostni su wutrobnje na zhromadny wulět přeprošeni.

## Boža mša w serbskej řeči w Drježdžanach

Serbja z Drježdžan a wokoliny, jich přiwuzni a přećeljo su přeprošeni na Božu mšu z fararjom Gabrišom Nawku njedźelu, 23. awgusta, w 17 hodź. do cyrkwy swjateho Antonija w Drježdžanach-Löbtauwe, Bünauska 10. Po kemšach zetkamy so k serbskej bjesadze.

*Marjana Bubnerjec*

## Floristika za cyrkej a wosadnicu

Dom biskopa Bena w Smochćicach přeprošuje wšitkich zajimcow sobotu, 19. septembra, na kurs floristiki k temje domchowanka. Tak změje kóždy wobdžělnik móžnosć, sej swoju žnjensku krónu stworić. Tež floristiske wuhotowanje cyrkwy a wosadnicy na swjedženju domchowanki budže tema seminara. Zajimcy njech so prošu hač do štwórtka, 20. awgusta, w Smochćicach přizjewja, telefonowe čisło (03 59 35) 2 20.